



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 7

Griffiths-i Mumbai City FC den tenangzüktepba yanglushi

Taliban-i khen atema PM inyaktsü Maulvi Kabir shim



VOL. XX NO. 215 (ADOK 215) DIMAPUR YANGTEPNÜ (THURSDAY) MONUPII (MAY) 18, 2023 ₹ 5.00

## May 24 nü HSLC & HSSLC results adoktsü

**Dimapur, May 17, 2023 (TYO):** May 24, 2023 anügang High School Leaving Certificate (HSLC) aser Higher Secondary School Leaving Examination (HSSLC) Examinations 2023 results metetdaksütsü ta Nagaland Board of School Education (NBSE)-i Bodbarnü ashi.

NBSE-isa results ji printed form, internet aser parnok indang Android Mobile result app ajanga metetdaksütsü ta shiogo.

NBSE nung züngsema aliba reju ajak dangi HSLC aser HSSLC examination 2023 indang provisional Result Gazettes yoktsü.

Result Gazettes den küleml Marksheets/Pass Certificates yoktsü aser NBSE Portal www.nbsenl.edu.in nung soft copy angutsü.

Maneni, internet nung tsünglanglen agüja aliba websites

nung provisional results reprangtsü akok. [www.nbsenl.edu.in](http://www.nbsenl.edu.in) [www.indiareresults.com](http://www.indiareresults.com) [www.results.shiksha](http://www.results.shiksha) [www.exametc.com](http://www.exametc.com)

NBSE-i ketdangüsü agiba HSLC aser HSSLC examination 2023 indang marks/marksheet tsünglanglen agüja aliba websites nungi download asütsü akok.

[www.nbsenl.edu.in](http://www.nbsenl.edu.in) [www.indiareresults.com](http://www.indiareresults.com) [www.results.shiksha](http://www.results.shiksha)

May 29-30 nungang Centre Superintendents dangi documents yoktsü aser Centre Superintendent-i pei pei centre kübok school nem lema agütsütsü.

Centre Superintendent marutetsüsa kümra tanga Centre Superintendent ka nem tashi agütsütsü akok ta NBSE-i metetdaksü.

## Mizoram nung Manipur nung 6500 tema jenoka lir

**Aizawl, May 17, 2023 (Agencies):** Manipur nung Internally Displaced Persons (IDP) lisopur 6500 tema Mizoram nung jenoka lir.

May 3, 2023 nungi Manipur nung non-tribal Meitei aser lisopurtem tsüngda mepetmesü adokba sülen Mizoram nung lisopur aika jenok aser May 17 nunga Manipur nungi lisopur aika aruogo ta ketdangür kati ashi.

Manipur nungi lisopurtem Mizoram kübok district 6 nung jenoka lir. Parnok ya Aizawl district nung nisung 2,409, Saitual district nung 2,165, Kolasib district nung 2,163, Champhai nung 142, Serchhip

nung 18 aser Khawzawl nung 17 jenoka lir.

Mizoram nung NGO Coordination Committee (NGOCC)-i Deobarnü New Delhi nung Union Home Minister Amit Shah den ajurutep aser Manipur nung Zo nungeri timtem ajuruba osang lemsatp.

Parnoki Union Home Minister dang Manipur nung tensa süngjemtsü aser nisung ajaki agizüketba lemtet ka agütsü atema mepishia liasü.

NGOCC lennirtemisa Union Minister Kiren Rijiju aser Congress lennir Rahul Gandhi na den ajurutepa Manipur indang tensa osang lemsatpogo.

## Manipur Congress lennirtemi Kharge den ajurutep

**New Delhi, May 17, 2023 (Agencies):** Manipur Congress lennir aser taoba Chief Minister Okram Ibobi Singh-i anir party lennirtemi Delhi nung national president Mallikarjun Kharge den ajurutepogo.

Manipur Congress lennirtemi Kharge den Manipur indang osang lemsatp aser idangji Congress-i observers telok ka yoktsü metetdaksü.

"INC Manipur lennirtemi Manipur nung nübertem

timtem kanga ajuruba osang kü den lemsatpogo. Yakta Congress-i observers telok ka yoka osang agiteptsü" ta Mallikarjun Kharge-i ashi.

"Manipur nung tensa mejungi lir aser temlung raksar. Centre sorkari state nung tensa mesüngjem tashi mapa inyaktsüla. Telok ajaki yimjung bener aruba nung shilem agütsüla. Nisung ajak dak tamang akatsüla" ta pai metetdaksü.


## Dimapur nung an shi mayoktsü: PUD

**Dimapur, May 17, 2023 (TYO):** Poultry Union Dimapur (PUD)-i May 17 nungi Dimapur nung an shi mayoktsü tenokdangba agütsüogo.

Dimapur Municipal Council (DMC)-i broiler (live) seret ka nung Rs 160 aser broiler (dressed) seret ka nung Rs 250 jenjang latettsüba anema PUD-i

iba tenokdangba agütsü. Assam nung an taküm seret ka (wholesale rate) nung Rs 180- Rs 190 lir aser dressed seret ka nung Rs 300 lir. Iba tetezü Dimapur nungbo an shi ayokertemi DMC jenjang latettsüba ama takoksa nung dang ayoktsüsa akümtsü ta PUD-i ashi.

## Supreme Court-i Manipur High Court tetuyuba aitsür



**New Delhi, May 17, 2023 (Agencies):** Taküm March ita Manipur High Court-i state sorkar dang Meitei nung Scheduled Tribe list nung dendaktsütsü tetuyuba agütsüba Supreme Court-i aitsüogo.

Manipur nung Meitei nung er non-tribal lir. Chief Justice D.Y. Chandrachud-i aniba bench kati Bodbarnü Manipur High Court oshidang aitsü.

Manipur High Court-i tetuyuba agütsüba ya tesüiba nung Supreme Court indang constitutional bench balalai Scheduled Castes mesüra Scheduled Tribes dak sendakba ken o tem atema oshidang agütsüba anema lir. Tesüiba nung SC-i oshidang agüja aruba nung iba ama jenjang (ST/SC) ta

okadaki tuyutsü makok ta shiogo, ta Chief Justice-i aniba bench-i tanü metetdaksü.

"Onoki Manipur High Court indang tetuyuba sota atatsüsa akümer kechiyong iba ya kanga dang aibelen ka lir" ta parnokisa ashi.

SC indang bench nung Chief Justice Chandrachud den justice P.S. Narasimha aser justice J.B. Pardiwala na dena lir.

Parnokisa Chief Minister ama temzüng ketdangürtemi kanga dang bilemdanga inyaktsü aser tensa tamajungba akümtsüsa olen mejembitsü metetdaksüogo.

Iba onük atema division bench ka tsüngdang temepishiba ka benoka aliba angazüka SC bench-i iba tetuyuba sota atatsü tetuyuba magütsü.

Manipur sorkari application

ka agütsüba atema Manipur high court nung acting chief justice M.V. Muralidaran-i March 27 nü state sorkar nem Meitei nung nem ST jenjang agütsütsü mapang apuloktsü.

Tanü Supreme Court nung Manipur sorkar atema Solicitor General Tushar Mehta-i noktakang state sorkari tensa azüoktsü atema mapa balala inyakba osang metetdaksü.

Manipur indang tebilemstü tulutibaji Myanmar nungi ozüng alema arurtem indang lir ta Tushar Mehta-i ashi.

Justice Muralidaran-i March 27 nü tetuyuba agütsüba anema Manipur HC indang division bench ka tsüngdang ken o benoka lir. Iba atema May 16 nü notice ka agütsüogo ta Mehta-isa ashi.

"Onoki Justice Muralidaran dang pai aibelenba metongshitsü atema mapang agütsü saka pai ibaji meinyak. Anungji onoki joko iba anema inyaktsüla. High Court judges-i constitutional bench judgments sülen manidakra onoki teinyaktsü tim inyaktsü" ta Supreme Court bench-isa metetdaksü.

Supreme Court-isa May 17, 2023 nü Manipur sorkar dang relief and rehabilitation maparen ajak indang osang tasen ka agütsütsü tetuyuba agütsüogo.

## Manipur Naga lennirtemi 'Peace Committee' ka tentet

**Imphal, May 17, 2023 (Agencies):** United Naga Council (UNC)-i Mongulbarnü Manipur nung Naga lennirtem den senden ka amen.

Senapati district kübok Tahamzam nung aliba TNK hall nung senden amen aser Naga lennir 300 shi aden ta osang angazüker.

Senden nung Naga lennirtemi parnok tebilembatem lemsatp aser Manipur tensa osang jemi saka bangzüng kecha magi aser tatembang lemtetji UNC indang presidential meeting nung ang

agütsü ta osang ajanga ashi.

Külen, UNC kübok züngsem 9 agi akümba Peace Committee ka tentetogo aser parnoki Manipur nung yimjung bener arutsü atema inyaktsü.

Iba luden ya taoba Naga Hoho vice-president aser taoba UNC president G Gaingam lenisüba kübok asütsü. Luden nungsa UNC nung taoba tir pezü aser Ukhrul, Chandel, Senapati o Tamenglong nung Naga nung telok balala nung tang teinyakdak tir pezü dena lir.

"Onoki May 10 nü Coordinating Committee of

Manipur Integrity (COCOMI) den ajurutepogo aser parnok dang state nung yimjung bener arutsü shiogo" ta taoba UNC president aser Peace Committee co-convenor Kho John-i ashi.

Peace Committee-i Manipur Governor Sushri Anusuiya Uiquey aser Security Adviser to the Government of Manipur Kuldiep Singh na den ajurutepogo aser tena dang National Highways o foothills aser kin ana tsüngda arrtsülen central security forces mapa lezmüksütsü shiogo, ta Kho John-isa ashi.

## Mokokchung nung kaketshirtemi professors anienba magizüker

**Dimapur, May 17, 2023 (TYO):** Mokokchung district nung aliba college ana nungi professors anir aoba atema Ongpangkong Students' Conference (OKM) aser Mokokchung College of Teacher Education Students' Union (MCTESU)-i sangdong balala ajanga tebilemstü abenba metetdaksüogo.

Tawa tu Department of Higher and Technical Education ajanga Kohima, Wokha aser Mokokchung district tem nungi professors 12 mapa belentsü tetuyuba agüja liasü.

Professor 12 ji New Model College, Wakching, Mon aser New Model College,

Mangkolemba, Mokokchung nung inyaktsü tetuyuba agütsü.

May 9 nü Department of Higher and Technical Education-i tetuyuba agütsüba nung Fazl Ali College nungi professor 5 aser Mokokchung College of Teacher Education nungi professor 2 mapa belentsü shia lir.

"Professor tem mapa belenba ajanga college tem nung nübo ajema akümtsü aser Mokokchung district nung higher education ecosystem nung timtem ajurutsü anungji department-i tetuyuba meyipa agütsü mepishir" ta OKM-i metetdaksü.

Külen, MCTESU-ia tanga sangdong ka ajanga department

dang tetuyuba agütsü mepishio.

"MCTE nung regular teacher educators 7 dang lir aser iba nungi professor 2 anienba ajanga college ketdangüsüba nung tetsükdaksü ajuruba dang masü saka NCTE norms matongba ajanga onok college de-recognition asütsü, kechiyong B.Ed College nung minimum regular faculty ji 7 asütsüla" ta MCTESU-i metetdaksü.

"Shitakba nungbo MCTE tashi aittsü atema tesayur talila nungdaker" ta kaketshirtemi ashi.

MCTE-i 2024 nung NAAC assessment atema renemer anungji professor ana manientsü atema mepishir, ta parnokisa metetdaksü.

### Women SHG Federation Pfutsero Block office building semzük



Pfutsero nung May 16, 2023 nü Women SHG Federation Pfutsero Block office building semzükba mapang tangokba noksa ka nung Lanula Kronu, Superintendent, Department of Power, Nagaland aser dangartem angur.

**Kohima, Monupii/May 17 (TYO):** Women SHG Federation Pfutsero Block indang office building ka May 16, 2023 nü Lanula Kronu, Superintendent, Department of Power, Nagaland ajanga semzükja liasü.

Iba sentong nung Kronu-i SHG ya kanga tongtipang lir aser item ya ajanga nüburtem ajangzük aser sen arutsü lenmang bushiteter, ta ashi.

Women SHG Federation Pfutsero Block ajanga state rongsenketzüng tajungba kumdaktsüsü asoshi meranga inyakba atema lai pelaba lemsatapa liasü.

Lai SHG züngsemtem dang ochishia, nendaka inyaktsü ayongzük liasü.

Iba sentong nung Vekhrolo Koza, BDO cum BMM; Zhalié Puro, ADPM, NSRLM Phek; Zhonelü Tunyi, president Chakhesang Mother's Association aser Nezelü Nyekha, executive director, Chakhesang Women Welfare Society nungtem temia jembia liasü.

Rev. Dr. Tshiilingupe Kapfo, pastor PTBC ajanga iba ki meshitetsü aser iba ki meshitetba sentong Nüvolü Chiero, convenor, Building Committee lenisüba kübok agia

liasü. Iba office building semzükba sülen Women SHG Federation Pfutsero Block lokti senden mena liasü.

Iba senden nung Veliihii Vero ajanga kisüba osang agütsü, kong menden Apfiile Kapfo liasü aser Wepretsoü Kupa ajanga tepela o jembia liasü.

Iba sentong nung SHG Porba Village aser Kewekhro L. Mero nungeri sobaliba ken aser temeja ken aten aser Lhiteweiü Wetsah ajanga melepzung o jembia liasü.

Sentong temer Persimmon saplings lema agütsü.

### Kohima nung Mahendra's Education Centre ka semzükogo



**Kohima, Monupii/May 17 (TYO):** Advisor, CAWD & Taxes, Kudecho Khamo-i May 17, 2023 nü Kohima jila nung Razhü Point anasa Mahendra's Education Centre (MEC) Kohima semzükja liasü.

Iba sentong nung jembidang, tsürabor, nübur aser sorkar atema tebilemstü tulutibaji employment ya lir, ta Khamo-i ashi.

Sorkar sector nung mapa angütsü asoshi tajungtiba dang nüngdaka kumogo, aser lanurtem competitive exam ajak nung tokteptetsüsa renemtsü nüngdaker, ta pai ashi.

Nagaland nung private sector nung maongka tajung lir, saka nüburtemi government mapa ang bushir saka government mapa angutsü asoshi nisung kaji tajungtiba rongnunga tajungtiba asütsüla, ta Advisor Khamo-i ashi.

Nisung aikati ochimashi, kinunger aser sendaktepa alir kisüng shimba mesüra metettepa alirtem nem dang sorkar mapa agütsür amai

bilemer aser candidate tem jelia shima yuogo ta tembia lanurtem tezü tangdaktsür, saka meranga inyaker aser tajungtem teti lenmang lir, ta pai ashi.

Taoba mapang dang nungi competitive exam tem tang tali tongtipangba kumogo aser state nung Nagaland Public Service Commission aser Nagaland Staff Selection Board ya tongtipangtiba exam ana lir, anungji lanurtemi maongka agia meranga azüngtsü aser iba amala coaching centre nungi angazüktsüla, ta pai ayongzük liasü.

Competitive exam asoshi renemba kaketshirtem dang pei sasa pei dak temolung alemstü aser meranga inyaktsü ayongzük liasü.

Iba reju indang kibur - Kuto Khusoh aser Dr David na lungiemer state yimtiba nung iba ama coaching centre tajung amenokba atema Khamo-i pelaba lemsatap.

Iba institute indang kibur Khusoh-i ashiba agi, Mahendra Educational Private Limited ya

national based coaching institute lir aser head branch ya Lucknow nung lir.

State 22 dak tema nungi Mahendra Educational Private Limited ajanga amenokba coaching centre tem nungi takok angur lanur lakh pezü dak tema lir aser Nagaland nunga taoba küm tetsüng ajemoka Dimapur aser Chumoukedima nung centre lapok aser tang Kohima nung lapoker, ta ashi.

Nagaland nung coaching atema national brand mezüngbubaji Mahendra ya alitsü aser parnokki SSC aser Banking tatidang tem atema coaching agütsür, ta pai ashi.

India tesem balala nung tesayur takotet, tests atema Smart Lab aser Library amala aliba ajanga MECK nungi state civil services aser central government services nung 2022 küm takok angur liasü, ta pai ashi.

Iba sentong nung menden Yingtam Phom liasü aser Nukhonieli Venuh ajanga melepzung o jembia liasü.

### NBSE ajanga NEP 2020 (4.9) atema metetdaktsür

**Dimapur, Monupii/May 17 (TYO):** Pei azüngtsü lenmang yanglutsü aser takum asoshi sentong yanglutetsü mechi physical education, arts and crafts, aser vocational skills densema azüngtsü asoshi subject tem shimba nung National Education Policy (NEP) 2020 (4.9) yagi maongka tajungba agütsür, ta Nagaland Board of School Education (NBSE) sangdong ka ajanga ashi.

Anungji iba NEP 2020 indang sentong tejakleni bener aotsü asoshi kakets reju shia subject tem peria alitsüla, aji asünung dang kaketshir temi

pa/lai jangraba subject shimtetsü.

Aji asünung higher secondary institutions tem dang iba sangdong ya junga angaoker NBSE indang scheme of studies kübok subject timba sayutsü metetdaktsü.

Kaket reju temi kaketshirtem atema subject of choice (tatishtsü agi History mesüra Philosophy, mesüra Political Science mesüra Economics) balaka mayutsüla saka kakets reju agütsüba subject tem pei molungba nung shimtetsü asoshi kaketshir nem temeden agütsütsüla, ta sangdong ajangasa ashi.

### Mon District Planning & Development Board senden menogo



**Dimapur, Monupii/May 17 (TYO):** Mon District Planning & Development Board (DPDB) senden May 16, 2023 nü Deputy Commissioner, Mon, Ajit Kumar Verma IAS lenisüba kübok DC Mon indang Conference Hall nung mena liasü.

Iba senden nung New Site aser main Bazar Mon town tsüngta apu yanglushitsü atema jembia aser DUDA aser DPDB chairman dangi yoka liasü.

Board ajanga alternative Power line ama Longleng nungi Mon tashi 132 KV Transmission line yanglutsü aser Mon jila nung 2x25 MVA Substation amenoktsü atema jembia liasü. Yei Students' Union registration atema iba senden nung jembia

aser tim department dangi yok.

Iba senden nung Chingkao, Aboi nung Laifa School lapoktsü, Goodwill School Mon lapoktsü aser Eastwood School Mon indang class 5 aser 8 recognition atema agizük liasü.

SDO(C) Mon, Rongsenmenla ajanga iba senden nung Mon district nung akaba NASHA MUKT BHARAT ABHIYAN District level Awareness Campaign indang PowerPoint agüja liasü.

Iba senden nung Deputy Commissioner, Mon ajanga züngsemtem dang Officer's Club nung tajungtiba agi shilem agitsü ayongzük aser ketdangsur aika Mon nungi transfer aoba mechi ketdangpur tasen shimoka liasü.

### Mon DDMA senden amen

**Dimapur, Monupii/May 17 (TYO):** District Disaster Management Authority (DDMA) Mon pur küm nung pezüben amenba DDMA senden May 16, 2023 nü Deputy Commissioner, Mon indang Conference Hall nung mena liasü.

Iba senden nung Deputy Commissioner & Chairman DDMA, Mon, Ajit Kumar Verma ajanga züngsemtem dang district nung tzüngluruwa marudang renemshia aser saksalema alitsü ayongzük liasü.

Superintendent of Police, Mon, Uniel Kichu ajanga district

terenlok atema züngsem ajak dang telungiem nung kati ka den angatettepa inyaktsü ayongzük.

Iba mapang PWD (R&B)/ Housing, Out Post Administration of Town Councils, District Education Officer, Food & Civil Supplies, Chief Medical Officer, Veterinary and Animals Husbandry, Power, Home Guards & Civil Defence SDRF, Fire & Emergency Services department temi parnok meyi mapang lendong balala atalokdang nüburtem den yariteptsü asoshi renema aliba osang agüja liasü.

**Office of the**  
**AO KAKETSHIR TELONGJEM SHILLONG**  
(Ao Students' Union Shillong)  
H.Q Shillong Meghalaya

**METETDAKTSÜR**

Aoer Kaketshirtem Shillong-i arua kakets shisatsü bushiba nung teyari nüngdaka lira, Ao Kaketshir Telongjem Shillong (AKTS) Office-i yaritsü mulunga aser renemalir. Anungji Schools/Colleges/ Universities nung admission agitsü aser talidak hostel/paying guest bushitepba yariteptsü asoshi kaketshirtemi agüja aliba number nung tongteprateptsü sangdonger

President	: Sentiakum Imchen (6009361037)
Vice President	: Nokchira Jamir (878535327)
General Secretary	: Yimsenna Jamir (9366259998)
Asst.General Secretary	: Sentiwapang Ozukum (8119042320)

**Sd/-**  
**(Sentiakum Imchen)**  
President,  
AKTS # 6009361037

**Sd/-**  
**(Lipoksenla Mongro)**  
Statistical  
and Educational Secretary  
AKTS. # 7640905885

### Siddaramaiah aser Shivakumar na melentepa CM inyaksüa akok



May 17, 2023 nü Bengaluru nung Congress lenir, Siddaramaiah pusemertemi par kima adenshir pa nem chief minister menden agütsüsüla, ta takhangba agütsüba noksa nung angur.

**New Delhi, Monupii/May 17 (Agencies):** Karnataka assembly election nung Congress party-i takok anguba sülen state nung tongti lenir ana tsüngda Chief Minister menden raktepba agi tang tashi sorkar mekümteti lir.

Taoba mapang Karnataka chief minister, Siddaramaiah aser Karnataka Congress Tir, DK Shivakumar nati Chief Minister menden rakteper, ajisüaka tang tasen shimba MLA tem teimbakati Siddaramaiah pusemer.

Congress osang ka ajanga angazükba agi, Siddaramaiah chief minister shimtsüa akok aser Shivakumar Deputy Chief Minister shimtsüa akok.

Ajisüaka Karnataka Congress nung telok ana kuma melemsatsü atema Congress central lenirtemibo tena melentepa Chief Minister inyakdaksünir; tetezü ka küm ana ser tesadang inyaksü aser tanüngba kümsük küm ana ser tesadangji ka CM asütsü.

Siddaramaiah aser

Shivakumar napronglai Congress lenir, Rahul Gandhi ajurua jembio.

Mongolbar aonung Congress National Tir, Mallikarjun Kharge-ia iba onük nung telemtetba agitsü nükjidong nung Karnataka nungi lenir anaprong ajurua jembio.

Arrshi küm 75 Siddaramaiah aser arrshi küm 61 Shivakumar na dang Delhi nung dang monga liang ta tuyuogo, ta Congress osang ka ajanga metetdaksü.

Karnataka Chief Minister shimtsü atema Congress Central lenirtemi Siddaramaiah aser DK Shivakumar na den senden aiben mena arudar.

Bodhbarnü UPA Chairperson, Sonia Gandhi-a Himachal Pradesh nungi Delhi tonga aruba sülen lai party lenirtem kar ajurua Karnataka CM shimtsü atema jembio.

DK Shivakumar-ibo Sonia Gandhi-i kechi telemtetba agidir pai iba nungji ai-aura akatsü melungogo ta osang angazüker.

Kharge den senden amenba sülen osangbenertem den

jembidang Congress general secretary (Organisation), KC Venugopal-i, "Telemtetba tajung agitsü. Tekaraba nung telemtetba tajung agitsü," ta metetdaksü.

Tang Rajasthan nunga Congress tsüngda telok ana lemsar lir aser Chhattisgarh nunga telemsa adoka lir. Madhya Pradesh nung Jyotiraditya Scindia-i Congress toktsüba ajanga party kanga takoksa angu. Yamaji lenisüba menden dak sendakba nung Karnataka nunga telemsa adoktsüa party-i tsübur, ibayongji tajungtiba nung telemtetba agitsü meranger.

"Karnataka Chief Minister atema tang tashi nungbo telemtetba magi. Congress Tiri stakeholders ajak ajuruogo, anungji pai Rahul Gandhi aser Sonia Gandhi na ajurua jembiba sülen tatembangbuba telemtetba agitsü. Telemtetba menor agitsüa akok aser telemtetba agiba sangdongji Bengaluru nung agütsüsüa akok," ta party osang ajanga metetdaksü.

### Ita ishika tsüngda Dengue vaccine tendang tenzüksü: ICMR

**New Delhi, May 17 (Agencies):** Taruba ita ishika tsüngda Panacea Biotech-i yangluba dengue vaccine tendangba shilem tasembuba tenzüksü, ta osang ka ajanga metetdaksü.

Panacea Biotech-i iba vaccine ji Indian Council of Medical Research (ICMR) den senteper yanglu.

"Tendangba shilem

tasembuba nung shilem agirtemji nisung mashie shimtsü. Shilem agirtem mesüra tendangertem shingaia shiba nem vaccine agütsüar memetetsü," ta kasa osang ajanga metetdaksü.

"Iba vaccine tendangdar saka ano junga metenzük, kechiyong ita asem tejaklen product merenemtetba agi onoki company-i product yangluba atar. Company-i

August tashi nungbo renemtsüla, iba sülen ita ishika tsüngda tendangba shilem tasembuba tenzüksü," ta ICMR Director General, Dr. Rajiv Bahl-i metetdaksü.

"Iba vaccine tendangba tongti nükjidongji dengue fever nokdangtsü atema lir. Tanabuba nükjidongji iba vaccine ajanga temang nung timtem magütsüsü atema lir," ta paisa ashi.



May 17, 2023 nü Mumbai nung United States Ambassador to India, Eric Garcetti-i Jama Masjid semdangba mapang tangokba noksa nung angur.

### 2024 Lok Sabha election atema BSP-i May 18 nü senden ayonger

**Lucknow, May 17 (Agencies):** 2024 küm Lok Sabha election atema asalentong yanglutsü asoshi Bahujan Samaj Party (BSP) tongti lenir, Mayawati-i May 18 nü Lucknow nung party office ketdangpur ajak senden ayongzükogo.

Iba senden nungji taruba Lok Sabha election atema Uttar Pradesh nung ruling party-i yimtenren tsütsü tajangzük angutsü atema sorkar machinery tim mesüi amshiba aser tamangba yimsü amshiba atema jembitsü.

"Nüburtem anema mapatong balala benokba aser metokmeperi miimbangtsü

atema UP nung ruling party-i sorkar machinery tim mesüi amshiba aser yimtenren tsütsü tajangzük angutsü atema tamangba yimsü amshiba ya shisabulutsüa lir. Iba ya ajanga democracy raksatsür," ta Mayawati-i Hindi oshi agi twitter ajanga metetdaksü.

Taoba mapang Uttar Pradesh Chief Minister, Mamata-isa, Uttar Pradesh nung divisional aser district balala nungi presidents aser office ketdangpurtem Brihostibarnü senden amenba mapang nungji nübur anemba teloktem anema raratsü atema jembitsü aser Lok Sabha election atema asalentong yanglutsü, ta metetdaksü.



Jammu, May 17, 2023: Jammu nung G20 senden jakdang iba sentong nung shilem agitsüpur telok kati renemshidang tangokba noksa nung angur.

### Japan nung G7 senden alidang PM Modi-i US Tir Joe Biden ajurutsü

**New Delhi, May 17 (Agencies):** Japan nung G7 senden aliba mapang nung Ato kilonser, Narendra Modi-i US Tir, Joe Biden den jurila senden amentsü, ta osang ka ajanga metetdaksü.

US Tir, Joe Biden-i linük nung tongtibang nüngdak aika adokba ajanga Quad senden nung adentsü atema Australia-i aotsü aliba thinen; ibaji ajanga US, India, Australia aser Japan lenirtemia Quad senden thinenogo.

Ajisüaka taküm June ita nung Japan nung G7 senden ayongzükba aliba mapang nung Quad lenirtem ajurua senden amentsü.

June 19 nungi June 21 tashi Japan kübok Hiroshima yimti nung G7 senden nung adentsü atema Japan Ato kilonser, Kishida Fumio-i Narendra Modi aser Australia Ato kilonser nata jaok.

Quadrilateral Security Dialogue (Quad) züngsem linüktemji US, India, Australia aser Japan lir aser züngsem linüktemi asalentong tsütsü amalitepa inyaker.

G7 linüktem rongnung US, Canada, France, Germany, Italy, Japan aser UK lir.

Russia-a G7 nung densema liasü saka parnoki tashiyim

amshia Ukraine kübok Crimea region agiba agi 2014 küm G7 nungi anentsüogo.

G7 senden nung Modi-i yimjung, sustainability, chiyungtsü aser energy security aser climate change indang jembitsü, ta India Ministry of External Affairs-i metetdaksü.

1974 küm Pokhran, Rajasthan nung India-i nuclear tendangba sülenbo tang mezüing India Ato kilonser kati G7 senden nung jembitsü.

Japan Ato kilonser, Kishida ya Hiroshima nungi lir aser iba yimti ya Second World War mapang atomic bomb ajanga poksaja liasü.

India ya UN Nuclear Non-Proliferation Treaty tezüngzüktep agia alirtem rongnung densema mali. Iba Treaty ajanga nuclear hadir aser raraba hadir technology nokdang.

G7 senden tembangba sülen Modi-i Papua New Guinea kübok Port Moresby semdangtsü aser pa leniba nung 3buba Forum for India-Pacific Islands Co-operation senden amentsü.

Iba telok nung India den Pacific Island linük 14 densema lir. Tang mezüing India Ato kilonser kati Papua New Guinea semdangtsü.



## TIR YIMYIM YIMOBILEM (EDITORIAL)

DIMAPUR YANGTEPNÜ, MONUPII(MAY) 18, 2023

### Tebok chizükba police magitsü

**A**ssam nungbo yi jemer aser tebok chizüker aliba policitembo mapa nungi anentsütsü ta sangdongba osang ya asenok ajak asoshi osang tasen ka lir aser iba osang yagi Assam nung dang masü saka Nagaland nunga dena mapa inyaksü imlar. Aiben India nunger police o America nunger police na asoajen aser temang anepalubaren nung medemdanga repringdangdang, America nunger police-tembo tebok mali, teku temelem, tapu aser tepi nung shi tetsü longteta adokba agi tsüngteper aser melangteperitem temang amai ayangayanger kanga jeretpereta angur saka India nunger police-tem repringdanga teimbaka tebok chizüker, tar dangbo teberem talangba, tetsüng agi tebok makok, kecha auer-ashir arishia oa aputsulabo masü aser garia jungjunga zep ta anener külenang tanemi alutsüba dang ashi longzüka tsüksüba lendong ana nung dang lir. Atangji, linük nung policitem ya mitkartem anungji parnokji nokinketeritem asütsüla. Aji dang masü, police-tem süoshi zep ta agir pei mapa nung wainshin meteta yakyaka jajaba kisüng agi pei lima aser pei yimti akhümкета topur jungdaksür. Iba khuretji memetet ser police-tem karbo police süoshia mashimashi agir, tula button-a matang aser lang pants zip a meshibang yi agi meseper yimdong nung mangazüa jajaba ajurur. Ano, khen khenbo police süoshi agir kia metongtet kima yimdong nung mejanga angur. Ano aiben check post nung khu abenba garitem dang nungi sen meshia angudang, policitem jagi memetet parnok akhüm samadoker aser nübortemi meraketa merepranger. Aji oda, sen o akhüm samaba naji medemdangtsü makok, senjibo jenjang ka atakteta lir saka akhüm aketba jenjangbo masadangtetter. Item ajakji kin ka ajungketba mapatem nung tongtibang shilemtem lir. Iba tangatetba nung Assam Chief minister-i Assam nung yi jemer police-tem nem sodi agütsütsü ta metetdaksür lia, ano tang paisa Assam police shirnok pei tar den mesütep tebok chizüker temang retreta kümer ali, parnokji ita asem tsüngda tebokji arema ludaksür temang touzükji tar den sütepa ajema mekümdaksütetra, parnok nema 'voluntary retirement' agütsütsü ta metetdaksüba jagi Assam police-tem pei temang dang masü saka mapa nung dena asentenshiba mapang ka asütsü. Shin o nung ashi ama, temeim mapa aser temelenshi ajak pei taküm nung mezüng tenzüksübjaji tongtibang asünungji, ozüng raksartem mittsü atema shimtetba police-tem tama pei jakla yimya aser temang shitak ayutsü tenzüksübjaji, atangji, kanga tongtibang lir. Assam police-tem denji asenok Nagaland police achiajemba aser temang anepaluba yimyatem medemdangra, ashiko, asenokbo yijemer aser tebok chizükertem dang masü saka mozümora achirtema aika alitsüa akok. Nagaland nung NPSC ajanga NPS nung shimertem dak alaka parnok kübok aliba police-tem shimtsü asoshi lanur tejangrar ajaki meteta yimjak nung 'advertisement' agüja sangdongbabo mapang talangka mangashir. Tetezüji, tashi alirtemi pei shimnüsü shimoker südi, anungji Nagaland police asütsü atemabo temang shitak ali mali tendanga asemtepa, pongshishiba aser tenük, teku aser temepu tashi repringa tendangbatembo kanga retretabo magir südi. Ashi, tsükchir den raratsü aser ozüng raksartem azüoktsü atema shimba sepaitemjibo asoajen tetemsü, terangrang, teyakyak, wainshin metetba aser peisasa azüoka litetba nisung ka asütsü tim. Item jagi linük mita ali nung dang sensosangertem ayip ajangtsü aser pei lima aser yimti tipdema alitsü. Item ajakji bilemdanga, ozüng magütsüyonga peisasa pei mapa meteta Nagaland police-tema Assam police-tem amaji tuluba nungi shir tilatiba tashi pei temang shitak yutetba aser peisasa pei taküm achiajem nung azüoka litetba mitkar kaka asütsüsa tang nungi danga peisasa mulungteta melenshitsu. Assam police-tem ama masü, Nagaland police rongnungbo yijemer-a malia aser peisasa achiajem mazüokba agi tebok chizükertema malia ta shitetlasang, alima tsüngdang Naga nunger koda nümadangtetla !

## OLEMSABANG

### NAGA NUNGER YASHI, TANÜ ASER ASÜNG INDANG

~ B. Wati Jamir Arkong Ward, Mokokchung.

*(Yashi adok nungi...)*

Iba sübokrem agiba asoshi asenok tekümdangtsü koma shia ali, itemji asenoki repringdangdi;

Tazüngkonem 27: 25 nung yamai shia lir, "shibai tai makaba tepsettsü asoshi sübokrem agidir pa atakatem süang aser nisung ajaki ashitsü" "Amen" Tanü asen lima nung nüburtem jendi lenirtemi mashileni aniba asenoki angur. Tiyazü kuli ajanga tai maketer aitsür aser ochishir kottetsü atema sübokrem amshir, saka item asoshi lai o-i yamai ashir, "shibai sübokrem asoshi tamajunger medendaksür aser tai makaba nungi ochi rakzükadoker, parnok asoshi aiatai" (Isaia 5: 23) aji oda nisung tsüngdang temeden apia aser takok apia sübokrem amshiaka Tsüngremi item mapa kodanga magizüker, aser kenübo item maparen jungkai adoktsü. Kechiyong temenen nisungi Tsüngremi ashiba anema inyakerji Tsüngremi memerenshiang malitsü.

Mika 3:11-12 nungjia yamai shia angutsü: Tongtipuri sübokrem asoshi o bendanger aser putirtem taa agütsüba agi sayur, aser ainkartem sen asoshi jembir, aji süaka parnok Kibuba dak metaloker asen rongnung Kibuba melika ma? Tia tamajung kecha agia asenok madak madongtsü ta ashir. Anungji nenok mechi Zion alu ama ajensatsü aser Yirusalem teraksa tamajung ka akümtsü aser tenlaki tenemji min tenem ama alitsü. Iba lai o ya tanü asen Naga lima yimden tensa den kanga dang putepa lir. Yimsüsürtemi election mechi nung parnok takok ngunüdüng Tsüngrem tenüng amer sayutsüngir tajung ka ama sayutsüngia jajar, aser nübur dang tiyazü kuli atemer Tsüngrem amadoker aser Tsüngremi Khristan lenir ka koma lidaktsüner yamaji meliteter, nübur atema inyaksü melena pei takar akümtsü ariteper, nübur ajak ajung inyaksü melen pei kin kinunger nem dang teyari agütsür aser iba jagi nübur rongnung meputep dang adokdaksür. Tsürabur otsü nung ashiba ama kurasa tali melemer laa-sa tali apur. Tetezü takarsa tali takarba kümer, saka sensaker sa tali sensakaba akümer.

Aji oda asen lenirtem tanü amaisa lira Naga limaji Tsüngremi shimtetba lima ka masü saka atakatem lima ka akümtsü, anungji tanü lenirtemi nüburtem rongnung tesünep aser yimjung yanglutsüa nüburtem mechi nung danga lenirtem tangatetep nung yimsüsüa aser temeim lia nübur tenzüksüla, kechiaser Tsüngrem o-i shir "Ni nisung o aser Kotak tenyar o agi jembiake temeim melira ni yongmen yi takuba ola mesüra takushiba yim aküm (I Korint 13:1). Ano maneni Amos 8:4 nung yamai ashir" "Ya angang, oh nenok mekokminer meyokertem aser linük nung sensaker tamakok ngudaksürtem" aji tanü Naga nunger lenir rongnung inyakba talubosa lir. Ano maneni Amos 5: 12 nunga kanga dang tejangja shia aliba yamai, "Kechiyong nenok ozüng raksaba jenti aser nenok temenen koba tulu ni meteta lir, nenoki tai maketer kangshir aser sübokrem agir aser mekokmiener süngküm nung nungina yoker".

Aji oda tanü asen lima ya repringdangra alar (slave) lima amai kümogo. 2021 December Oting Mon District nung kechi atalok? Iba mapang Naga nunger tulu tila ajaki aser alima kintem ajungai kukua aitsü, Naga nunger lokti tentet ajunga den Chief Minister nungi dena ola tulu adok. India Army den kenyongi ama litep (tesendaktep) malitsü ta kin HOHO ajungai osang kakat tapu balala nung prokshi. State Government dang masü India parliament tashi nung tesüngmangtsü junga zülur agütsü (submit). Obendanger tapu balala-ia tai temeden tejangja alima dangi prokshi, aser state level tashi nunga Chief minister den elected minister nungi tenzükler MLA tilatiba tashi nem iba tasür aser yirur alir nem temeden tejangja agütsü aser aibelenertem merenshitsu ozüng tesashi agütsü. Saka tanü tashi kecha ola maka; kin HOHO den civil societies ajunga ola sashira adokbatu, amalitep malitsü atema ta ibajia samadokogo. India Parliament nung amentsü atema yokba ajanga lokti balalai ozüng tesashi renembatu saladok. Assam Rifles (A.R) unit balala yimtsüng balala den ano shisaluyimer (students) lokti tentet balala den civic program and Army Development Group (ADG) agi mesür jajaba nung anidaka jajar.

*(Maneni asüng adok nung...)*

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Khristan meyrjang aikati sarasadem sentong ka nung shilem agitsü



Yaküm UK kübok South West Coast Path nung sarasadem dang tangokba noksa nung angur.

**May 17, 2023:** Taruba Honibarnü (May 20) nü United Kingdom nung Arogo balala nungi Khristan meyrjang aikati sarasadem sentong ka nung shilem agitsü.

South West Awake nung Khristan 4,000 dak temai mile 630 Coast Path nung longbanga nokdaker sarasadem sentong nung shilem agitsü.

Taküm agi küm asembuba iba sentong agitsü. Yaküm-a iba sentong nung Khristan 3,000 dak temai shilem agia liasü.

May 20 nü anepdang 10:30 ako nungi 11:00 ako tashi Coast Path ya sarasadem inzü ka akümsü, kechiyong region nung aliba Khristan meyrjang aika longjemer pei medemer aser kiyongertem atema sarasademtsüba den külemi pei yimtsüng, jila, yimti, telok balala, charities, agencies aser company balala atema sarasademtsütsü.

Parnokisa shirangertem,

Arogotem aser nürburtem atema sarasademtsütsü.

Special audio prayer guide ka ajanga sarasadem sentongji anitsü.

Iba sentong ya region nung aliba organisations aser Arogo balala ayongzüik; item telok aser Arogotem rongnung Creation Fest, South West Youth Ministries, Diocese of Exeter, Rediscover Church aser Hope Baptist Church densema lir.

Iba sentong ya khenyongi balaka asütsü, kechiyong tamangertemi Tenla kidang masü saka moapu nung külem tamangertem den longjemer sarasademtsü.

Iba sentong nung adentsü atema South West nung alirtem-a ajak jaoker.

South Coast Path ya mile 630 talang lir aser mile shia nungji telok balala lemzüksür Tsüngrem külemba den külemi linük atema sarasademtsü.

Iba sentong ya denomination ka-ana atema masü saka denomination balala ajak nungi temelungertemi shilem agitsü akok.

Iba sentong ayongzüikertem rongnung Rediscover Arogo nungi pastor Mark Pugh-i, "Arogotemi nürburtem den lenmang aika nung sendakteper; Arogoi temeim mapa inyakba den food banks ajanga teimla agütsür, counselling, kibongtem atema nüngdak balala agütsür aser lanur teloktem atema inyaker. Tsüngremi asenok meimer aser Pa temeim tangar den Pa temeim lemsatepdaksüner, iba yongji Arogoi item mapa inyaker," ta metetdaksü.

Paisa, "Sarasadem nung tashi tulu lir. South West Awake nung Khristan meyrjang aikati nürburtem shi aser tanela nung tejakleni aotsü atema sarasademtsütsü," ta shisem.

## Uttar Pradesh state nung pastor ka densema Khristan 8 apu

**May 17, 2023:** Uttar Pradesh state nung anti-conversion oziung alema inyakogo, ta tai tonglokja tatalokba balala ana nung pastor ka den kinüngtsü na denema nisung ti puogo.

May 14 nü Uttar Pradesh kübok Ghaziabad yimti nung police-i pastor Ibrahim Thomas, pa kinüngtsü Reewa aser Babita Thakur nungeri beauty parlor ka nung tetsür ka Khristan yimsü dangi meyipdaksütsü merang, ta tai tonglokja apu.

BJP lenir, Sunita Arora-i, Khoda kiyong nung aliba beauty parlor kati la aja aser la dang Khristan yimsü dangi meyipang ta ashi, ta lai parnok nem tai tongloktsü.

Beauty parlor ji Thakur meyong lir aser pastor Thomas o pa kinüngtsü nati beauty parlor nungji tetsür telok ka dang sayutsüngia liasü, ta Arora-i metetdaksü.

May 17 nü osangbener den

jembidang Khristan temedem atema inyaker, Minakshi Singh-i, Amongnü police-i Khristan asemji apuba sülen Dasana Jail nung puokogo, ta metetdaksü.

Uttar Pradesh nung aliba charity telok Unity in Compassion nung general secretary, Singh-isa, "Parnok bail nung chioksü atema oziü legal team-i court nung jembidar," ta metetdaksü.

Laisa, pastor Thomas-i tetsür telok ka dang sayutsüngiba noksaji police ket nung lir ta police-i ashi, ta metetdaksü.

Ghaziabad nung deputy commissioner of police, Vivek Yadav-i, "Tai tonglokja alirtemji telok kar den sendaktepa lir asü maliar onoki bushisüngdangdar," ta metetdaksü.

Uttar Pradesh Prohibition of Unlawful Conversion of Religion Act, 2021 oziung kübok par asem anema ken o benoka lir, ta police-i metetdaksü.

Ano tanga tatalokba ka nung, May 14 anogo nungsa Uttar Pradesh kübok Kaushambi district nunga anti-conversion oziung kübok Khristan pongu apu.

Sianta yim dak Mahraj Saroj, Umakant Maurya, Mahendra Kumar aser Ved Prakash nung den nisung kati yaritepa tribal nisungtem Khristan yimsü dangi meyipdaksütsü atema taneptsüba sentong ka ayongzüka agi, ta police-i metetdaksü.

Police ketdangser kati, Khristan telok jagi tribal nisungtem dang, nenoki Khristan yimsü dangi meyipra tashidak ajak aneptsü ta shia yimtsüngtem sema senzür, ta ashi.

Uttar Pradesh nung pastor, Pasty David-i, Khristan pongupronglaji jail nung puoka lir aser parnok bail nung chioksü atema onoki inyakdar, ta metetdaksü.

## ANO GO ABEN TSÜNGREM DEN

### Teyangluba shisadangba

Tsüngremer teyangluba asadanger, ken züluri zülü: "O Kibuba, ne mapatem koda jenti lir! Parnok ajak nai ne tesangra shisatsü agi yanglu: Ne teyanglubatem agi alima sünga lir" (t.24).

Mezüngbuba, teyanglubai Tsüngremer shisatsü jungkai adoktsür. Mopung koba nung kechi atentsüla aji tera melenshi nung asenok ajak süadoktsü. Tsüngrem alima yangluba leman, Pai tsüngkümtem renemba yimya, Pai yangluba tsüngkümtem renemba yimya, Pai yangluba ajak külemi toktsübaji Pa shisatsü tulu jungkai adokba lir. Pai alima yimya, tsüngküm mongpu, ita petinutem, teyangluba ajak pei mapang nung shidak azüoktetra Pai asen taküm kechi asütsüla aji meinyaktetsü asü?

Tanabuba, Tsüngremer teyangluba Pa rongsen dena lir. "O Kibuba, ne mapatem koda jenti lir! Parnok ajak nai ne shisatsü tesangra agi yanglu: Ne teyanglubatem agi alima sünga lir" (t.24). Pa rongsen meteni asenok taküm alitsü makok. Hon taribi aser senti osetji dang Pa rongsen masü, lung, süngjang aser tsük ajak Pa rongsen lir.

Tasembuba, teyangluba jagi nisung mapa inyakdaksüra. "Nisungi pei mapai aor, aser aonung matong tashi inyaker" (t.23). Adam a Eden tsüki nung mapa inyak. Mapaji khuret masü temoatsü ka lir, asenoki ibaji Kibuba nung inyakra.

Pezübuba, teyangluba jagi asenoki Tsüngrem külemtsü ajungmesor. "O Kibuba, ne mapatem koda jenti." Asenoki teyangluba mekülemer-ibaji süngyanglu külemba lir. Asenoki teyanglur Tsüngrem külemer. Pai asenok nem sempet tajung asen tabensa agütsür ta asenoki amanger (Yakob 1:17). Asenok asen Teyanglur tulu, aser asenok Kümtetdakba külemdi.

Teyanglubai Tsüngrem shisatsü sayur, anungji pelatepang! Teyangluba nung Pa rongsen dena lir, anungji ibai Pa sentsüwangshi asoshi amshiang. Teyanglubai nisung nem mapa agütsür, anungji mapaji temoatsü ka ta angatettang. Saka item dang nungi tulutibaji, teyanglubai Kibuba külemtsü na ajungmesodakjang.

## Khristan lawyer temi Manipur nung takoksa angurtem yaritsü mepishir

**May 17, 2023:** Law practice Parnoki shidi ajanga Chief asür Khristan putirtem aser Justice dang, timtemba nun tem telok kati Central legal service agency dang Manipur-i team ka yoka takoksa angurtem nem teyari agüjang, ta mepishio.

National Lawyers Forum of Priests & Religious (NLFRP)-i shidi ka ajanga Chief Justice of India, D. Y. Chandrachud dang, Manipur nung tetsür-tanurtem densema nisung meyrjang aika relief camps nung timtemdar, anungji tangsa parnok nem teyari agütsütsüla, ta mepishi.

Chief Justice ya National Legal Service Authority (NALSA) nung Patron-in-Chief lir aser NLFRP nung Khristan lawyers 200 dak tema lir.

NLFRP nung Convenor aser Jesuit putir, A. Santhanam-i iba shidi nungji sign süa lir.

Santhanam ya Tamil Nadu nung aliba Madurai high court nunga lawyer inyaker.

Justice dang, timtemba nürburtem yaritsü atema lawyers team ka Manipur-i tekaraba nung yoktsüla, ta mepishi.

A. Santhanam-i, May 3 nü Manipur nung rara adokba sülen tang tashi nung nisung 71 süogo aser nisung 45,000 dak tema relief camps nung lir, ta metetdaksü.

Manipur nung ki 1,700 aser denomination balala indang Tenla ki 121 rongdoktsüba den külemi Khristantem meyong kiojen aika raksatsüogo.

Nisung 5,000 shi Meghalaya aser Assam ama kidanger state tem nung jenoka lir aser parnok kidangi meyipa maruteter; iba ama tensa nung takoksa angurtem nem teyari agütsütsüji legal fraternity teinyaktsü shilem lir, ta NLFRP-i metetdaksü.

"Manipur Legal Services Authority den yaritepa ibaji inyaktsü akok," ta parnokisa metetdaksü.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Putet**

(v) tsüngsü metetadok, teka agi karaa amer aruba (identified, caught)

\* Lanurtemi auer putet aser arishia aoba agi putet.

**Puti**

(n) Lipoklisang ( origin of culture and customs)

\* Puti nung aibelener dang yimteni senchi achir.

**OLONG PAITEP # 6518**

	1			2	3				
4			5						6
					7				
	8								
	9			10			11		
					12				13
14									
					15				

**TIPLÉN**

- 2. Sü jeplok - (4)
- 4. O agi merenshi - (5)
- 7. Ayongküm li - (5)
- 8. Chiyungtsü mapang süiadok - (4)
- 9. Tsüngrem den jembiba - (9)
- 12. Saklok - (4)
- 14. Samaba mebushitet - (5)
- 15. Mejanga onü - (5)
- 16. Tzü shiruru ka - (4)

**LANGTSÜNGLEN**

- 1. \_ \_ \_ \_ i - (4)
- 3. Kasa masü - (6)
- 5. Nüchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. \_ \_ \_ \_ \_ kibur - (5)
- 13. Tebur tembar tsüngda jatepba - (4)

**OLONG PAITEP # 6516 TELANGZÜBA**

**TIPLÉN :**

- 1. Semtu, 3. Lepko, 5. Bilem,
- 8. Ulu, 10. Tsüngpang,
- 11. Tesangwa, 13. Aoksa,
- 15. Putir, 16. Yipru.

**LANGTSÜNGLEN :**

- 1. Sayu, 2. Teb, 4. Kimong,
- 6. Lungkak, 7. Milak, 9. Zünga,
- 10. Temopu, 12. Walu, 14. Ali.



**ALOKBA O WARAKLA NA TANUR MASOBA AGI KIBONG NUNG YIMJUNG MALI:**

- Alokba** : Asenok medemertembo ajak tanur schooli ao tenzüker, asenbo tang tashi kata mali, ya koda pilemer?
- Warakla** : Koda pilemtsü aka, kecha mepilemka.
- Alokba** : Kibong akümbaji soya-pokyaa alitsüang laishiba nunga shia lir nung nibo kanga tia maka, na ya tsürabur nungi azü nung aruba "Tapongla" nütsü ya tapongla asüjakoti.
- Warakla** : Kechi azü nungi aruba, huh? Kütsü tapongla süra ni ya kong nungi aruata, shibai asoar shiangjong, saala.
- Alokba** : Waaa hauna, sorry!!

Lilir : WhatsApp

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.



- 1. Tenüng : .....
- 2. Tasoba anogo: .....
- 3. Küm : ..... 4. Class : .....
- 5. School : .....
- 6. Talidak : .....
- 7. Salem osang : .....

**Arunachal sorkari mountaineer Tapi Mra bushitsü**



**Itanagar, May 17, 2023**

(Agencies): Everester Tapi Mra, APO (DYA) aser pa den yariteper Niku Dao na tanaben bushitsü atema Department of Sports & Youth Affairs, Arunachal Pradesh-i senden ka amentsü.

May 18 anüngdang 12:30 ako nungi Ld Chief Secretary, GoAP menden ser menden amentsü.

Tapi Mra ya Arunachal Pradesh nungi Mount Everest-i mezüng atuba mountaineer lir aser pa den külemi pa den yariteper Niku Dao na Khyarw Satam peak nungi aludang sama.

Arunachal Pradesh nunger Tapi Mra-i 2009 küm Mount

Everest kolaki tuteta liasü aser Arunachal Pradesh kübok East Kameng district nung Mount Khyarisatam-i atudang samar joko hopta ka shi arur.

"Adventure Promotion Officer (APO), Directorate of Youth Affairs, Govt of Arunachal Pradesh Tapi Mra-i East Kameng district nung Mt Khyarisatam-i atutsü mepishia liasü" ta Deputy Commissioner Pravimal Abhishek Polumatla-i ashi.

Iba luden nung mendenji Secretary (Sports & Youth Affairs) asütsü aser Deputy Commissioner, East Kameng District Member, Director,

Disaster Management, GoAP, Director (Sports), GoAP, Director (NIMAS) Dirang, W/ Kameng District, SP East Kameng District, President & General Secretary Tagin Cultural Member Society (TCS), Commandant 12 Bn NDRF, Itanagar, Commandant SDRF Itanagar, Dr Anshu Jansempa, Padmashree Awardee 5 times Mt Everest summiteers Member Tagil Sorang, Everester (Team Leader) aser par telok adentsü.

Iba luden nungsa everester Tapi Mra, APO (DYA) aser pa den yariteper Niku Dao'er kinungertem adentsü.

**Assam police-i Kamrup nung PFI züngsem ka apu**

**Guwahati, May 17, 2023**

(Agencies): Assam police-i Popular Front of India (PFI) anema mapa inyaka arudang May 17 nü Kamrup district nung PFI züngsem ka puogo.

Parnoki Nagarbera nung Abdul Razzaq Ali ta ser PFI züngsem ka apu.

"Abdul Razzaq Ali ya mapang talangka jenshia aru aser Polahartari nung police-i pa apu" ta Nagarbera police station nung Officer-in-

Charge Mirel Ahmed-i ashi.

"Yasüng onoki mita ao aser tanü PFI züngsem Abdul Razzaq Ali apu. PFI anema onoki maneni inyaksü. Pa ya yaküm September ita nungi jenshia aru" ta Mirel Ahmed-i ashi.

Nagarbera tesem nung PFI züngsem kar lir aser police-i parnok aputsü atema maparen inyaka arudar, ta paisa ashi.

Taküm April ita National Investigation Agency (NIA)-i

state pezü nung Popular Front of India (PFI) anema mapa aika inyaka liasü.

NIA teloktemi Bihar nung tesem 12, Uttar Pradesh nung tesem 2 aser Punjab nung Ludhiana aser Goa nung PFI anema mapa inyak.

Assam Police-i April 24 nü Ansarullah Bangla Team (ABT) züngsem asem apu. Parnok ya Dhubri district kübok Al Qaeda den sendaktepa lir.

**New Delhi nung Tripura indang Queen pineapple ajungkettsü**

**Agartala, May 17, 2023**

(Agencies): Brihostibarnü New Delhi nung Tripura indang Queen Pineapple sayutsü aser iba ya national market nung talirtem bushitsü atema lir.

Tripura nung Queen pineapple ya tapu balaka lir aser state nungi Geographical Indication (GI)

product ji iba ya dang lir.

Iba exhibition ya Tripura Agriculture and Farmers' Welfare Department ajanga ayongzüker.

May 18 nungi May 22 tashi New Delhi kübok Pragati Maidan nung exhibition alitsü.

Iba exhibition ajanga Tripura nung aluyimertem nem maongka

agütsütsü ta minister Ratan Lal Nath-i ashi.

"Iba sentong ajanga national market nung Queen pineapple teimba yoktettsü. State sorkari agriculture sector ajungkettsü aser aluyimer taküm tajungba kümdaktsütsü atema tenangzükbä lir" ta pai ashi.



Meghalaya nung Voice of the People Party (VPP) züngsemtemi state indang reservation policy meyipa repringshiang ta takhangba agüja Bodbarnü Shillong nung lungkak aitiba angur. Additional Secretariat, Shillong anasa nisung aika adenshi aser parnok placards amer recruitment process athitsü takhangba agütsü. Sorkari reservation policy meyipa merepringshi tashi recruitment processes anena atatsüla ta VPP tanishir Ardent Miller Basaiawmoit-i osangbener dang ashi. (Shillong, May 17)

# Taliban-i khen atema PM inyaktsü Maulvi Kabir shim



Maulvi Abdul Kabir

**Kabul, Monupii/May 17 (Agencies):** Ato Kilonser Mullah Muhammad Hassan Akhund shirangba osangtem temai adokba sülen Taliban indang 'Supreme Leader' Haibatullah Akhundzada-i Afghanistan nung ato kilonser inyaka atatsü Bodhbarnü Maulvi Abdul Kabir shimogo.

Afghanistan nung amenoka aliba Khaama Press ajanga ashiba agi, Akhundzada taneptsü mangu tashi Maulvi Kabir ya Taliban sorkar tekolakba ama inyaka alitsü. Iba kiralongrar teloki 2021 küm yimten yimsüsüba mendeni tanaben meyiba shilangba sülen Taliban sorkar nung Haibatullah Akhundzada ya ato kilonser inyaka aru.

Khaama Press ajanga ashiba agi, Haibatullah Akhundzada ya temolungjang tashidak agi timtemer ta nisung kari ashi saka Taliban sorkari tang tashi Akhundzada shirangba indang osang kecha agüja mali.

Maulvi Kabir ya linük anüdoklen Paktika province nungi Zadrän kin nungi lir aser taoba mapan 1996 nungi 2001 tashi Taliban-i linük nung yimsüsüba mapang Nangarhar province indang governor inyaka liasü.

Taliban nungertem rongnung Maulvi Kabir ya tejangja nisung ka lir aser Qatar nung United States den jembishinüba mapang tongti shilem agia liasü.

Pai shilem agiba ajanga Doha

Agreement zülutep, koba US aser Taliban tsüngta tongtipang alizüng tongtetba tezüngzüktep ka lir, koba nung Afghanistan nungi US sepaitem ainshitsü aser yimjung atema sentongtem renema lir.

Iba agreement ya Afghan nungter tsüngta jembishinütsü aser linük nung yimtenren tangatetep kati arutsü lenmang lapoktsü nükjijong nung zülutepa liasü. Afghanistan nungi US sepaitem ainshiba ajanga temelenshi mapang ka liasü, Kechiaser Taliban-i iba sülen kanga kera linük nung yimsü asitsü tenzük.

Ajisüaka jembishinü mapang yangluba sentong tem mapa kuma meinyaktet, kechiaser Taliban-i aniba sorkari tetsürtem school-i aoba nokdang aser mapa inyakba nung tetsürtem shilem magidaktsü, anungji Afghanistan nung tetsür temeden aziüoktsü ozüng bener marutsü ta nangzükba nung aibelena liasü.

2021 küm August ita Taliban tanaben shia aruba sülen Maulvi Kabir ya tongti shilem balala agia aru. Mezüngbo pa Akhund indang economic deputy asosho assistant ka ama shima liasü aser mapang tatsüka lir Taliban ato kilonser indang political deputy jenjang angu.

Pa jenjang balala nung shimogoba ajanga Taliban lenirtemi pa züngshiba sayur.

# Imran Khan'er kidang kiralongrar 40 lir: Punjab sorkar

**Lahore, Monupii/May 17 (Agencies):** Pakistan nung aliba Punjab police-i ashiba agi, taoba ato kilonser Imran Khan'er Zaman Park kidang kiralongrar 30-40 shi lir, aser itemi magütsüra operation agitsü, ta CNN-News18 ajanga angazük.

Interim Punjab Government-i police dang Zaman Park nung Pakistan Tehreek-e-Insaf tekolakbar kidang operation tuluka agitsü temelaba agütsüogo, ta osang ajanga Bodhbarnü ashi.

Punjab Interim Caretaker Information Minister Amir Mir-i ashiba agi, mitkar aliba tesem amakba nisung 30 nungi 40 tsüngta Zaman Park ki nung lir ta itdangiter osang ajanga ashir.

Pai Imran Khan'er party dang ghonda 24 tsüngta item nisungtem sorkar nem agütsütsü totuyuba agütsü.

Kiralongrar indang ken o military court ka nung jembitsü lemtetogo, ta caretaker information minister-i ashi.

Lahore nung Corps Commander House maka mi senloktsüba atema Punjab police-i May 10 nü Khan aser par party worker noklang aika anema ken o benok aser pa bukumer dang sorkar meyong ki o jen aser mitkar aliba tesem maka raksatsütsü ajungmesoba atema pa anema FIR pongu zülüoka lir.

Tang tashinung tai tonglokja alir nisung 3,400 pua lir aser ken o 254 benokogo. Kasa mapang ketdangsur temi nisung jangjatetba maparen tenzükogo.

Taoba Mongulbarnü Lahore Cantonment nung 'Jinnah House' nungja agütsür aliba senior military commander indang ki ka amakba atema Khan aser pa indang deputy Shah Mahmood Qureshi aser dangartem anema nisung tepsetba, kiralongra mapa inyakba aser ano mapa tamajung 20 inyakba ken o benoka lir.

Islamabad High Court kima Pakistan Rangers temi Mongulbarnü Imran Khan apuba ajanga Pakistan nung rongrongshiron tenzüka Hokulbarnü tashi liasü aser iba mapang nisung aika asü aser mitkar aser sorkar indang ki o jen tem longkak aiter temi raksatsü.

Pakistan puti otsü nung tang mezüngbuba longkak aiter temi Rawalpindi nung army headquarters (GHQ) telungi ai aser Lahore nung corps commander indang ki nung mi senloktsü.

Police temi iba mapang nisung ter asü ta ashir aser Khan'er party-i ashiba agi security personnel temi injang khaloktsüba mapang par party worker 40 takum sama.

# UK & Netherlands nati Ukraine nem jet fighter teyari agütsütsü nangzük

**Kyiv, Monupii/May 17 (Agencies):** United Kingdom aser Netherlands Ato Kilonser, Rishi Sunak aser Mark Rutte nati Ukraine nem jet fighter jet teyari agütsütsü atema "international coalition" ka tentetsü asoshi mulungtepogo. Russia nungter sepaitem den raratsü atema Ukraine tir Volodymyr Zelenskyy-i mapang talangka nungi iba teyari ya meshia aruogo.

"Ato Kilonser aser Ato Kilonser Rutte nati Ukraine nem F16 jets aser training dena agütsütsüba densema combat air capabilities agütsütsü asoshi international coalition ka tentetsü atema longjemmer inyaktsü mulungtepogo," ta Mongolbarnü Iceland nung Council of Europe Summit nung senden ka amenba sülen Sunak indang Downing Street office otongdar kati ashi.

"Ato Kilonser-i Ukraine ya NATO nung züngoksemtsü langa lir ta bilemer aser tarutsü nung linük amakba nungi jenboa alitsü atema lenirtemi Ukraine nem security teyari agütsütsü nungdaker ta angatetba lemsatepogo," ta otongdarisa ashi.

US tir Joe Biden-i January ita United States-i fighter jets magütsütsü ta shiaka Europe nung NATO züngsem timba kati Ukraine nem parnok indang F-16s agütsütsü mulunga lir, ta Al

Jazeera osangbener John Psaropoulos-i ashi.

Psaropoulos-i ashiba agi, air defence expert temi ashiba agi, US nung yangluba F-16 fighter jets ajanga Russian air force dang nungi Ukraine jenjang tajungba kümdaktsütsü, ajisüaka missiles tashitait aser target balala indang osang tejangja ali nungdang iba ya ataloktsü aser iba ya-a anüolen aliba linüktemi agütsütsüsa akümtsü. Iba ajanga Ukraine pusemba anüolen aliba linüktem rara nung tali amoka inyaksangshidaktsütsü.

Rutte-i Mongolbarnü Twitter ajanga ashiba agi, Sunak tenati linük ana longjemmer inyaka aliba maparentem aser tang parnok longjemmer Ukraine nem teyari agütsütsüba indang sensaksemogo. Ajisüaka Dutch Ato Kilonser yagi fighter jet aser training agütsütsüba indangbo kecha osang magütsü.

Anüolen aliba linüktemi Ukraine nem advanced fighter aircraft tem agütsütsü asoshi atsüayonga arudar, kechiyong iba ajanga rara tamajungba kümdaktsütsü ta bilemer. Ajisüaka Hombarnü Sunak ajuruba sülen Zelenskyy-i ashiba agi, fighter jet coalition dak sendakba nung maparentem tejakleni bener odar.

Hombarnü France tir Emmanuel Macron-ia, par

linüki Ukraine nungter fighter pilots tem nem training agütsütsü asoshi kishi lapoktsüogo ta ashi, ajisüaka pai Ukraine nungter sepai nem rara dang amshiba tayimtsübo magütsütsü ta shia arudar.

"Europe nung renema aliba linüktem den külemi onokia pilot tem nem training agütsütsü asoshi kishi lapoktsüogo. America den tang sensaksema alitsü," ta Macron-i TF1 broadcaster den sensaksema mapang ashi.

"Training tang nungi tenzükttetsü," ta pai ashi, ajisüaka osang tejangja kecha magütsü.

Dutch news outlet NOS

sangdong ka ajanga Mongolbarnü ashiba agi, Ato Kilonser Rutte-i May 4 nü Zelenskyy-i Netherlands semdangba mapang F-16 supply asütsü atema UK, Denmark aser Belgium den sensaksemdar aser kasa mapang nung Amsterdam aser London na fighter planes dak sendaka aliba ken o tem sensaksemdar, ta shiogo.

Reykjavik, Iceland nung Mongolbarn Council of Europe Summit nung o jembiba mapang Zelenskyy-i anüolen aliba linüktem dang Ukraine indang air defences tali tashitaitba kümdaktsütsü asoshi teyari meshia liasü. Kyiv dak

khaloktsüba Russia nungter indang hypersonic missile tem kanga takok ngua khadangba mapang ka nung pai iba temepeshiba agüja liasü.

"Ukraine litsü tulu lir aser yasüng ama linük ajunga nung missile tem khadangtsü asoshi air defence systems aser missile talila nungdaker. Onoki ano modern fighter jets nungdaker, kechiyong iba ya medeni air defence system tabensa masütsü. Iba ya onok nem agütsütsü imlar," ta Ukraine nungter lenir yagi ashi.

Zelenskyy-isa, Sunak aser Rutte nati fighter jets agütsütsü nangzükba atema kanga pelaba lemsatepa liasü.



May 17, 2023 : Italy kübok Bologna jila nung zümetsüng adoka alidak yimtong nung bagtem nung lisem tsünger motzü nokdangtsü asoshi nangteta aliba noksa nung angur. Meimlai lia tzünglu kanga sashia aruba ajanga Emilia Romagna nung zümetsüng adoka traintem jajaba anen aser schooltem shibangtsüsa aküm.

## ANTA-i 1buba Open Carrom asayamung ayonger

**Kohima, Monupii/May 17 (TYO):** All Nagaland Taxi Association (ANTA) HQ Kohima-i ayongzüka June 23 aser 24 nü 1buba Open Carrom asayamung asayatsü. Iba asayamung ya ISBT, Regional Taxi Parking Kohima nung asayatsü.

Asayamung nung kija asaya akoker nem senpet sen 25,000 aser runner-up nem senpet sen 15,000 agütsütsü. Semifinal tonga asayaba asayar nem senpet sen 5000 agütsütsü. Kasa mapang nung tarep asaya akoker nem senpet sen 30,000 aser runner-up nem 20,000 aser semifinal tonga asayaba team ana nem 7000 agütsütsü.

Asayamung nung shilem agütsü atema kija aser tarep asaya asoshi entry fee sen 1000 aser 1500 asütsü. Form tem ANTA HQ Kohima office, Daklane, Kohima, ANTA office, ISBT, Regional Taxi Parking Kohima aser United Traders, Kohima nung angütsü.

## SAFF Championship: India team Pakistan, Kuwait & Nepal den ataogo

**Monupii/May 17, 2023**

**(Agencies):** 2023 SAFF Championship nung India team group A nung Pakistan, Nepal aser Kuwait den ataogo. Iba asayamung ya Bengaluru nung June 21 nungi July 4 nü tashi asayatsü. Kuwait ya iba asayamung atema jaokba team lir.

Group B nung ano asayamung atema jaokba team Lebanon, Maldives, Bhutan aser Bangladesh den ata lir. Asayamung atema draw ya Bodhbarnü Delhi nung süa liasü. Group asayatem round-robin league format nung asayatsü aser group shia nungi temaba jenjang nung tembangba team anana semifinals atema qualify asütsü. Iba asayamung ya Kanteerava Stadium nung asayatsü.

Lebanon aser Kuwait ya South Asia nung mali ajisiüka asayamung jenjang tajungba kümdakja tali toktepa

asayatsü nükjidong nung taküm iba asayamung atema jaokgo. Asayamung nung team ajak rongnung Lebanon (99) temaba jenjang nung lir aser Pakistan (195) ajak dang tekübokba jenjang nung lir. India team (101) tanabuba jenjang nung lir.

FIFA-i tenokdangba agütsüba sülen Sri Lanka taküm iba asayamung nung shilem magitsü aser Afghanistan-a Central Asian Football Federation nung adentsü atema SAFF toktsüogo.

1993 küm nungi tenzüka tang tashi nung iba asayamung 13ben asayaogo aser Pakistan team anaben tashi masayatetba sülen taküm iba asayamung nung shilem agütsü. 2015 küm India nung iba asayamung ayongzüka asayaba mapang telung ken o kar aliba ajanga Pakistan team shilem magitet aser 2021 küm FIFA-i tenokdangba agütsür

aliba ajanga shilem magitet, koba taoba küm agintsüogo.

Tang tashi nung iba asayamung ya India-i tiben koka lir aser defending champion Maldives-i anaben aser Afghanistan, Bangladesh aser Sri Lanka-i khen khen koka lir.

Pakistan aser India na tang tashi nung 32 ben asaya lir aser India-i 19ben kokogo aser Pakistan-i ponguben dang koka lir.

India aser Pakistan na tatamsa 2018 küm SAFF Championship semifinal nung asaya, koba India-i 3-1 agi akok.

Nepal dak sendakba nung India tebur team-i 2021 küm final nung 3-0 agi parnok koka iba asayamung tibenbuba koka liasü.

Kasa mapang nung Kuwait aser India na tatamsa 2010 küm international friendly ka asaya liasü aser iba asaya Kuwait-i goal 9-1 agi koka liasü.

## ATK Mohun Bagan nungja melenogo



**Monupii/May 17, 2023**

**(Agencies):** Fan temi mapang talangka nungi akhangba ama Mohun Bagan stakeholder temi Bodhbarnü sangdong ka ajanga club tenüng nungi ATK aginba metetdaksüogo.

Iba club ya RP Sanjiv Goenka Group meyong lir aser tang iba club dang Mohun Bagan Super Giant ta ajatsü. RPSG ya IPL nunga Lucknow Super Giants kibur lir. Parnok indang taoba IPL team ya Pune Supergiants liasü.

"Tanü board senden amenba sülen club tenüng 2023 küm June 1 nungi Mohun Bagan Super Giant (MBSG) ta ajatsü telemtetba agiogo," ta club

sangdong ka ajanga metetdaksü.

ATK Mohun Bagan puri iba season mezüngbuba Indian Super League kokogo. Taküm March ita final asaya nung parnoki penalty metsütepba sülen Bengaluru FC goal 4-3 agi koka liasü.

Asayamung akokba sülen Goenka-i, club tenüng nungi ATK ya agintsü aser MBSG ta ajatsü ta metetdakja liasü, saka Brehostibarnü board senden amenba sülenang anogo lemteta liasü.

"Onoki ATK aginer aser taruba season nungi Mohun Bagan Super Giant ta ajatsü. Nungja melentsü atema

inyaktepa aruogo. Iba osang sangdongtsü atema asayamung akoktsü ata liasü," ta Goenka-i ISL akokba sülen ashi.

Indian Super League anaben tashi koker aliba ATK ya taoba mapang Atletico de Kolkata ta ja liasü kechiyong parnok Madrid nung amendaker aliba Atletico Madrid den sendaktepa liasü.

Ajisiük season asem sülen parnok Atletico Madrid den pilaogo aser parnok indang stake shilem 25 RPSG Group dang yokogo, shirnok iba club principal kibur kümogo.

Iba sülen ATK-i Mohun Bagan nem teyari agütsü shirnok senotsü agi anüngba ajanga top-tier ISL-i aitsü asoshi timtema liasü.

RPSG Group-i, 2020-21 season metenzük tsüngda Mohun Bagan indang stake shilem 80 alizük aser club ana ya longjema 2020 küm June 1 nungi club ka aküm.

Ajisiüka küm 100 ka dak tema tain club nungja nung ATK sendaka aliba ya fan temi mesakloki liasü.

## Sudirman Cup: India-i 4-1 agi Australia kokogo

**New Delhi, Monupii/May 17 (Agencies):** Sudirman Cup nung India team-i Group C nung tatembangbuba asaya nung Australia 4-1 agi koka iba asayamung tembangogo. Iba asayamung ya Suzhou, China nung tang tasayadak lir.

Group stage nungi tsukatokaka India team-ia asaya kabo koker ang iba asayamung tembangogo. Parnoki Chinese Taipei aser Malaysia na mekoki liasü.

'Group of death' nung ataba sülen India team-i 1-4 agi Chinese Taipei makok aser 0-5 agi Malaysia mekoki iba asayamung nung tsüka liasü.

Bodhbarnü Australia den mezüngbuba asaya nung tarep temeyoktep asayar Sai Pratheek aser Tanisha Crasto nati Kenneth Zhe Hooi Choo

aser Gronya Somerville na 21-17, 14-21, 18-21 agi mekoki liasü.

Ajisiüka tebur kija asaya nung HS Prannoy-i 21-8, 21-8 agi Jack Yu ayong ayonga koka score kasasa aküm.

Iba sülen tetsür kija asaya nung PV Sindhu melen asayala Anupama Upadhyaya-i 21-16, 21-18 agi Tiffany Ho madak takok angu.

Maneni tebur tarep asayar MR Arjun and Dhruv Kapila natia Ricky Tang aser Ryane Wang na 21-11, 21-12 agi ayong ayonga akok aser India 3-1 agi tejakdang aküm.

Tatembangbuba asaya nung tetsür tarep asayar Tanisha Crasto aser Ashwini Ponnappa nati 21-19, 21-13 agi Kaitlyn Ea aser Angela Yu na koka India-i iba asaya ayong ayonga koka liasü.

## Griffiths-i Mumbai City FC den tenangzüktepba yanglushi



**New Delhi, Monupii/May 17 (Agencies):**

Mumbai City FC-i Bodhbarnü sangdong ka ajanga Rostyn Griffiths den küm ka atema tenangzüktepba yanglushiba sangdongogo aser iba tetezü Australia nung asayar ya 2023-24 season tatem tashi club nungi asayatsü.

Arishi küm 35 tain asayar yagi taoba asayamung nung Mumbai team nungi tongibang shilem agiogo, kong parnoki 2022-23 season atema Indian Super League (ISL) Winners' Shield koka liasü.

"Rostyn Griffiths den küm ka atema tenangzüktepba yanglushiba Mumbai City FC-i pelashishia sangdonger," ta club sangdong ka ajanga metetdaksü.

Mumbai team nungi mezüngbuba season asayaba mapang Griffiths-i pa asayaba

yimya tajung sayuogo aser asaya 17 nung pai tackles 28, interceptions 14 aser clearances 43 takok ngua süogo.

Iba den bendenloksema pai ATK Mohun Bagan den asayaba mapang kanga dang tongtibang goal ka idakja goal 2-2 nung asaya tembanga liasü.

Griffiths ya Mumbai City FC defence nung kanga tongtibang asayar ka aküm, shirnok asaya 20 nung goal 21 dang chia liasü.

Griffiths ya England nungi lir aser pa Blackburn Rovers nungi asaya tenzüka sülen Australia-i ao, kong pa Adelaide United, North Queensland Fury, aser Central Coast Mariners nungi asayaogo.

Pa taoba küm July 1 nü Mumbai City FC nung aru aden aser pa indang career nung chapter tasen ka tenzüka liasü.

**BILEMDANGANG**  
"Anema aliba dak alia jangrademtsü kecha mali."